

Katibunan di shon na Boneiru.

Komo ku na Boneiru, kontrario na Kòrsou, no tabata permití normalmente pa hendenan partikular establesé, kuminsando por ehèmpel ku negoshi, e isla aki no tabatin asina tantu katibu partikular, yamá katibu di shon. E poblashon katibu di Boneiru tabata konsistí prinsipalmente di katibu di rei, ku ta katibunan di gobièrnu.

Na algun okashon sporádiko sinembargo tabata sosodé ku gobièrnu tabata duna tòg pèrmit pa partikularnan establesé, pero esaki tabata mará na algun kondishon basta severo.

Tin un lista na Algemeen Rijksarchief (ARA) na Den Haag, Hulanda, di e doñonan di katibunan partikular i nòmber di e katibunan aki, di añanan 1862-1863, ku ta e añanan ku a dekrétá i ehekutá e lei riba abolishon di sklabilitut.

E motibu ku mester a produsí e lista aki e tempu ei tabata ku, debí na abolishon di sklabilitut, gobièrnu mester a paga e doñonan di katibu e balor di nan katibunan, pa asina nan por haña nan libertat na aña 1863. E suma ku gobièrnu a paga pa katibu tabata di 200 florin, sin importá si nan tabata mucha, adulto òf hende bieu.

A nombra un komishon konsistiendo di Wagner, Henry Suarez, D.E. Visser i W.B. Zeppenveldt pa inventarisá e katibunan di shon na Boneiru pa mira su enbèrdat e katibunan aki tabata eksistí.

Bartholomeus Albertus

Tabatin komo doño di katibu Bartholomeus Albertus. Despues ku e la muri, su viuda a sigui ku su negoshinan. Bo ta puntra bo mes un momentu dado kon famia Albertus aki, ku no tabata un famia konosí ántes komo doño di propiedat, a yega na katibu? Esaki kisas ta debí na e esposa di Bartholomeus Albertus, ku sí tabata un hende prosedente di un famia ku moda, esta famia Hart. Su nòmber tabata Anna Maria Hart, kasá pues ku Albertus.

E katibunan di Bartholomeus Albertus tabata Aliet (23) yu di Rosa, Nicolina Refina (16) i George (10), ámbos yu di Celestina. Nan tur tabata sirbiente den e kas di famia Albertus.

Promé ku el a fayesé, Bartholomeus Albertus a regla su tètamènt huntu ku Anna Maria Hart, su esposa. Dia di yanüari 1856 nan a aparesé dilanti Cornelis Boye, gezaghebber di Boneiru, pa atendé e trámitenan di tètamènt aki. Na e momentu ei ya kaba kondishon di salú di Bartholomeus Albertus tabata hopi malu, pero tòg e tabata den posishon pa atendé un ke otro, segun Boye.

E testigunan na e okashon ei tabata Anna Catharina, viuda di Bartolo Perez, un tal Lourens, mas aleu Maria Elisabeth i su esposo Willem Frederik Nicolaas. Un punto interesante ta ku Anna Catharina no por a skirbi.

Masoménos un luna despues ku a atendé su asuntunan di tètamènt, Bartholomeus Albertus a fayesé na edat di 46 aña. E fecha di su fayesimentu tabata 16 di febrüari 1856. E personanan ku a bin anunsiá su fayesimentu tabata Johannes Blijde i Hose Salomon.

Katibunan di Boye

Cornelis Boye, ku tabata gezaghebber, despues ku e no tabata den e funshon aki mas, a bira doño di e plantashi òf kunuku Yato Bako. En todo kaso, na aña 1862-1863, nan tabatin 24 katibu. Ernst Boye, yu hòmer di Cornelis Boye a hasi entrega di e lista di nan katibunan.

E 24 katibunan di famia Boye tabata:

1. Johannes yu di Annika, 60 aña di edat di profeshon agrikultor;
2. Petrona yu di Theresa, 57 aña di edat i di profeshon sirbiente di kas;
3. Rolla yu di Petrona, 26 aña di edat i di profeshon sirbiente di kas;
4. Georgina yu di Petrona, 24 aña i di profeshon sirbiente di kas;
5. Victor yu di Petrona, 22 aña i di profeshon agrikultor;
6. William Martinus yu di Petrona, 21 aña i di profeshon agrikultor;
7. Prudentia Mercelina yu di Petrona, 17 aña i di profeshon sirbiente di kas;
8. Abel yu di Petrona, 15 aña;
9. Abella yu di Petrona, 15 aña;
10. Carolina Paulina yu di Petrona, 13 aña;
11. Angenita yu di Theresa, 44 aña;
12. Thereson (m) yu di Angenita, 25 aña;
13. Aritrusa Cleopatra yu di Angenita, 21 aña;
14. Arnelia Clementina yu di Angenita;
15. Uranie yu di Angenita, 15 aña;
16. Antonia Teofila yu di Angenita, 10 aña;
17. Lizette yu di Angenita, 7 aña;
18. Petrona alias Sofia Blanka yu di Rolla, 9 aña;
19. Rosalinda yu di Rolla, 5 aña;
20. Sulfiana Ascencion yu di Rolla;
21. Petronia yu di Georgina, 6 aña;
22. Garibaldi Lukanor yu di Cleopatra, 2 aña;
23. Petrusa Claudina yu di Thereson (m);
24. Martinus yu di Anna Thina, 27 aña, nabegante.

Den kaso di e hende muhénan, kasi tur tabata hasi trabou di kas òf tambe algun trabou den kunuku, manera pikimentu di fruta di watapana i kòrtamentu di sentebibu. E muchanan, asina ku nan por a hasi algu, tambe tabata keda enbolbí den e proseso laboral riba e plantashi.

For di e lista di katibunan di famia Boye por konkluí tambe ku nan lo tabatin barku, den sentido ku Martinus yu di Anna Thina, tabata registrá komo nabegante di profeshon. Tabata normal tambe ku e doñonan di plantashi ántes tabatin tambe nan mes barku òf barkunan.

Boom

Un otro doño di katibu na Boneiru tabata Juan Ignacio Boom. E tabatin solamente un katibu: 1 Theodorus yu di Maria Bitorina Sebel. E tabatin na 1863 e edat di 61 aña.

Mas aleu tabatin Jan Boom ku solamente un katibu: 1. Piet Hein yu di Celestina, 31 aña di edat i nabegante.

Craane

Philip Frederik Craane tabatin na momentu di abolishon di sklabilitut 5 katibu:

1. Thomas yu di Arriette, 45 aña di edat i di profeshon nabegante;
2. Helena yu di Arriette, 40 aña di edat, sirbiente di kas;
3. Ferdinand Romando yu di Helena, 12 aña di edat;

4. Fransisco Matthias yu di Helena, 10 aña di edat;

5. Josepha Henriette yu di Helena, 8 aña di edat.

Famia Craane, ku a bini originalmente di Hulanda, tabata semper bai asosiá ku laman. Entre otro nan tabata enbolbí den konstrukshon i operashon di barku. Pero tambe tabatin Cai i Nechi Craane, dos persona ku tabata tambe doño di plantashi i pakus.

Famia Debrot

Un otro doño di katibu na 1863 tabata e viuda di Casper Geysels Debrot. E señora aki tabata doño di 4 katibu. Tabata trata aki di:

1. Jacomina yu di Helena, 38 aña;

2. Eugenius Nicodemus yu di Jacomina, 14 aña;

3. Alfonsus Robertus yu di Jacomina, 9 aña;

4. Joseph Cyprianus yu di Jacomina, 6 aña.

Un otro Debrot ku tabatin katibu i ku mester a risibí 200 florin pa katibu, debí ku a dekretá e lei ku katibunan mester a haña nan libertat na 1863, tabata Isaac Debrot. E katibunan di Isaac Debrot (jr) tabata na total kuater:

1. Eduard yu di Florencia, 30 aña i nabegante;

2. Anthon yu di Florencia, 24 aña di edat i nabegante;

3. Henriette Loriet yu di Willemina, 17 aña di edat i sirbiente di kas;

4. Balentina Elouisa yu di Willemina, 17 aña di edat i sirbiente di kas.

Charles Baggs Debrot tabatin 8 katibu na 1863:

1. Mauricia Ramon yu di Regina, 31 aña i sirbiente di kas;

2. Egmond Saragosa yu di Mauricia Ramon, 11 aña edat;

3. Oscar Carlister yu di Mauricia Ramon, 8 aña di edat;

4. Reinier Arsenius yu di Mauricia Ramon, 6 aña di edat;

5. Maria Robertina yu di Anna Thina, 22 aña di edat;

6. Paulina Oliba yu di Maria Robertina, 1 aña di edat;

7. Lambert yu di Maria Robertina, 3 aña di edat;

8. Rijnardus Martis yu di Georgana, 23 aña di edat i di profeshon agrikultor.

Dammers

Matthias Dammers, desendiente di un anterior komandùr di Boneiru, tabatin na 1863 un katibu:

1. George yu di Anna Cicilia, 31 aña di edat. E mama di Matthias Dammers tabata Maria Magdalena Semeler. Matthias mes a muri na aña 1863 na edat di 51 aña, motibu pa kua ta su esposa ku a keda tras, Maria Catharina Boekhoudt, mester a firma e dokumentunan nesesario, relashoná ku libertat pa e katibu aki, kontra pago di 200 florin.

Famia Hart

Den herensia di J.H. Hart, ku a keda na nòmber di su esposa, tabatin un katibu: 1. Jozef yu di Geertruida, 38 aña i di profeshon nabegante.

Un otro Hart ku katibu tabata Jan Frederik Hart Cz. Tabata su kasá, Maria Elisabeth Hart, ku a entregá e lista di katibu na gobièrnu. Bon mirá no por a papia di un lista, konsiderando ku e persona aki tabatin solamente un katibu: 1. Adelaida Paulina yu di Celestina, 25 aña di edat.

Jan Frederik Hart, kisas komo persona, tabatin tambe e katibu yamá: Fransisco Victor yu di Celestina, 20 aña di edat i di profeshon nabegante. Petronella Henriette Hart a firma e dokumentunan konserní pa Jan Frederik Hart.

Heiliger

Johannes Christiaan Heiliger tabata otro persona ku tabatin basta katibu na Boneiru, esta un total di 11. Tabata C.H. Friese ku a entregá lista di katibunan di Heiliger ku tabata bini na remarke pa optené nan libertat na 1863, debí na abolishon di sklabilitut.

E katibunan di Heiliger tabata:

1. Carmela yu di Rafaela, nasé na 1821 i sirbiente di kas;
2. Josephina yu di Carmela, nasé na 1845;
3. Carolina yu di Carmela, nasé na 1847;
4. Theodorus yu di Carmelita, nasé na 1848;
5. Helena yu di Carmela, nasé na 1850;
6. Wilhelmina yu di Carmela, nasé na 1853;
7. Betsy yu di Carmela, nasé na 1855;
8. Victor yu di Gracie, nas'e na 1829;
9. Mathilda yu di Victoir, nasé na 1849;
10. Leopold yu di Victoir, nasé na 1855;
11. August Herman yu di Josephine, nasé na 1861.

Coenraad Juhl

Un doño di katibu hopi importante, mirando e kantidat di katibu ku e tabatin na 1863, tabata e viuda di Coenraad Juhl. E persona aki tabatin 17 katibu:

1. Leonora yu di Helena, 83 aña di edat;
2. Bily yu di Marietje, 73 aña di edat;
3. Hernando (a muri promé ku abolishon di sklabilitut) yu di Helena, 1 aña di edat;
4. Delai yu di Magdalena, 53 aña di edat;
5. Nella yu di Christina, 44 aña di edat;
6. Saniet yu di Nella, 26 aña di edat;
7. Lefina yu di Delai, 26 aña di edat;
8. Calista Jewelina yu di Delai, 2 aña di edat;
9. Joseph yu di Nella, 8 aña di edat;
10. Bernardus Anthony yu di Nella, 18 aña di edat;
11. Alida Vitalus yu di Nella, 12 aña di edat;
12. Isidor Martinus yu di Delai, 11 aña di edat;
13. George yu di Nella, 9 aña di edat;
14. Mercelina Lotaria yu di Saniet, 8 aña di edat;
15. Dionicia Petronia yu di Nella, 6 aña di edat;
16. Hernilia Ernestina yu di Adelaida, 5 aña di edat;
17. Sevilla Gratia yu di Lavinia, 3 aña di edat.

De Jongh

Francois Martinus de Jongh a keda registrá na 1863 komo doño di dos katibu:

1. Entenie yu di Charlotte, 16 aña i sirbiente di kas;
2. Virginia yu di Charlotte, 14 aña di edat.

Leseur

Un otro doño di katibu na Boneiru tabata Sterling Leseur, ku a muri promé ku 1863, pero ku su esposa viuda a informá gobièrnu ku e tabatin 11 katibu. Tabata trata di e katibunan:

1. Michel yu di Carolina, 30 aña di edat;
2. Constancia yu di Maria, 54 aña di edat;
3. Julien yu di Constancia, 30 aña di edat;
4. Johana Martina yu di Constancia, 22 aña di edat;
- 5 Theodora yu di Constancia, 20 aña di edat;
6. Maria Bonifacia yu di Constancia, 17 aña di edat;
7. Alexander Dumas yu di Constancia, 13 aña di edat;
8. Clementia yu di Constancia, 10 aña di edat;
9. Gerard yu di Johanna Martina, 3 aña di edat;
10. Joseph Alice (m) yu di Johanna Martina, 1 aña di edat;
11. Anna Sophia yu di Anna Geertruida, 41 aña di edat.

E esposa di A.H. Sterling Leseur tabata Maria Magdalena Hart. Nan a kasa na 1837, pero na momentu ku e lei di abolishon di sklabilitut a drenta na vigor ya Sterling Leseur a fayesé i tabata Willem Frederik Meinhardt, un personahe konosí den enseñansa públiko i Iglesia Protestant di Boneiru, ku a testiguá relashoná ku e pago ku gobièrnu mester a hasi na viuda Maria Magdalena Hart. Tabata trata di un montante di fl.2.200,- ku e mester a haña komo pago pa e katibunan por a optené nan libertat na 1863.

Muskus

Un otro lista di katibu tabata esun di Johanna Elisabeth Muskus, ku tabata kasá ku Willem Frederik Meinhardt. E katibunan aki tabata:

1. Susanna Cleta yu di Maria Ignees, di 27 aña di edat, kosedó di profeshon;
2. Maria Rudolphina yu di Susanna Cleta, 9 aña di edat;
3. Virginia yu di Susanna Cleta, 1 aña di edat.

Willem Meinhardt a kasa na 1854 ku Johanna Elisabeth Muskus. E tempu dje matrimonio Meinhardt, un yu di Kòrsou, tabatin 24 aña di edat, miéntras ku Muskus, un rubiano, tabatin únikamente 14 aña di edat. Johanna Muskus tabata yu di Richard Raven Muskus i A.C. Raven i na aña 1863, momentu a abolí sklabilitut, e tabatin solamente 23 aña di edat. Pues probablemente e doño di katibu mas yòn ku tabatin e tempu ei na Boneiru.

Un otro Muskus doño di katibu na Boneiru na 1863 tabata Maria Elisabeth Muskus, un ruman di Johanna Muskus. Su katibunan, segun e lista entregá pa R.R. Muskus, tabata:

1. Bernadina yu di Christina, 28 aña di edat;
2. Emanuel Theodoor yu di Bernadina, 8 aña di edat;
3. Adolf Maximinus yu di Bernadina, 6 aña di edat;
4. Arnold Maximilian yu di Bernadina, 6 aña di edat;
5. Thelomina Celestina yu di Bernadina, 3 aña di edat;
6. Horatius Gabriel yu di Bernadina, 1 aña di edat.

Ya for di 1859 kaba a hasi un petishon pa manumisashon di Thelomina. A bende Bernadina na edat di 7 aña ku Joseph Anthony Yarzagaray pa e suma di fl.100,-. Yarzagaray a duna su yu muhé na Aruba e katibu aki na aña 1845.

Richard Raven Muskus, tata di Johanna i Maria Elisabeth, mes tambe tabatin katibu:

1. Nicolaas George Martis yu di Mercelina Merced, 30 aña di edat;
2. Guillermo St. Jago yu di Maria Augustina, 26 aña di edat i nabegante;
3. Martina Celestina yu di Emilia Maria alias Emilia yu di Maria Augustina, 35 aña di edat i sirbiente di kas;
4. Eduardo Lazarus i di Martina Celestina, 10 aña di edat, snèiru di profeshon;
5. Amalia Girigoria yu di Martina Celestina, 14 aña di edat;
6. Evelina Martina yu di Martina Celestina, 12 aña di edat;
7. Maria Elouisa yu di Martina Celestina, 7 aña di edat;
8. Magrietta Cypriana yu di Maria Celestina, 5 aña di edat;
9. Maria Oliana alias Georgina yu di Merelina Merced, 33 aña di edat;
10. Rosalia Romualdis yu di Maria Oliana, 6 aña di edat;
11. Mouricie yu di Clara, 28 aña di edat i labadó di paña; 12. Lucia Clemencia yu di Mouricie di 18 aña di edat.

Merens

Un di e 'borderel'-nan di katibu mas interesante na Boneiru na 1863 tabata esun di Johannes Merens, entregá pa su esposa Cornelia Merens. Nan tabatin solamente un katibu, yamá Thomas Philip yu di Celestina, 22 aña di edat, i di profeshon nabegante.

E punto interesante ta ku Johannes Merens, un di e yunan di e katibu Felixiana Emerentiana, un katibun ku a kumpra libertat di tur su yunan, pa despues kumpra su mes libertat komo katibu, mes tabata doño di katibu.

Ku un dedikashon atmirabel pa libra su famia for di sklabitut Felixiana ta logra kumpra libertat di tur su seis yunan i por último su mes libertat tambe. Felixiana tabata biba na Rincon.

E famnan ku e yunan di Felixiana Emerenciana a haña despues tabata Wajampibo, Merens, Filister, Emer, Emers. For di e famnan aki a bin eksistí despues entre otro Merenciana i Emerencia.

Kisas pasobra tabatin duda ku un anterior katibu, esta Johannes Merens, por tabatin katibu, un komishon ku tabata verifiká ku si e hendenan ku tabata entregá lista di katibu tabatin katibu enbèrdat, a bai hasi un investigashon. A konstatá enbèrdat ku riba dia 9 di mei 1863 e katibu menshoná, Thomas Philip, tabata den poder di Johannes Merens.

Aparte di Johannes Merens, un eks-katibu ku su mama, Felixiana Emerentiana, a kumpra libertat p'e, tabatin un mas yu di Emerentiana, pues tambe un eks-katibu, ku tabatin katibu despues. Ta trata aki di Maria Louisa Wajampibo. Maria Louisa Wajampibo tabatin dos katibu:

1. Lodewika yu di Celestina, 14 aña di edat, kria di kas; . Dororthea Carolina yu di Celestina, 12 aña di edat.

Neuman

Otro doño di katibu tabata Sophia Neuman, kasá ku Pieters Joseph Verhelst Dz. E katibunan aki, tur mucha, tabata:

1. Leopold Sales yu di Henriette Leonora, 4 año di edat;
2. Constant Bruno yu di Henriette Leonora, 2 año di edat;
3. Vesuvius Salcero yu di Emilia Paulina, 2 año di edat.

Sofia Neuman a kasa ku Verhelst na 1849. Verhelst (21) tabata yu di un tal Dominique Verhelst, ku tabata kasa ku Anna Maria Rasmijn. Sophia Neuman tabata yu di Carl Magnus Neuman i Lucia Emerentia Juhl.

A.W. Neuman Cz. tabata otro doño di katibu na 1863. Su katibu tabata: Luarenza yu di Julia, 4 año di edat. E katibu sinembargo e año ei tabata na Kòrsou.

J.F. Neuman Cz. tabatin tambe un katibu: Maria Juliana yu di Leonora Martinette di 4 año (Kòrsou).

Ta bolbe topa A.W. Neuman ku un katibu: Laura Pamhilia yu di Helena, 4 año di edat (Kòrsou). Prince

E 'borderel' di viuda J.H. Prince tabata konsistí na novèmber 1862, dia ku a entregá e lista aki, di 4 katibu:

1. Stebana yu di Pauletta, 53 año di edat, di profeshon sirbiente di kas;
2. Urtalies yu di Stebana, 24 año di edat, di profeshon agrikultor;
3. Wilfridus yu di Stebana, 13 año di edat, di profeshon kriá;
4. Carolina yu di Theresa, 49 año di edat, di profeshon trahadó di pan.

Palm

Jan Hendrik Palm tabatin 8 katibu:

1. Anna Thina yu di Theresa, 54 año di edat;
2. Leopold yu di Anna Thina, 31 año di edat, nabegante;
3. Rudolf yu di Anna Thina, 24 año di edat;
4. Bolina yu di Carolina, 24 año di edat;
5. Pieter yu di Bolina, 5 año di edat;
6. Karel yu di Bolina, 2 año di edat;
7. Willem yu di Bolina; 8. Polidor yu di Carolina, 28 año di edat, nabegante.

Pepino

Martien of Martijn Pipino tabatin dos katibu:

1. Julie yu di Paulette, 56 año di edat, kriá;
2. Martijn yu di Julie, 30 año di edat, kriá.

Suares

Henry Suares su borderel tabatin 9 katibu:

1. Louis yu di Maria;
2. Martien yu di Dorothea;
3. Mathilda yu di Dorothea;
4. Buenofacio yu di Dorothea;
5. Emilia yu di Merce;
6. Cleonisia yu di Merce;
7. Telemacus yu di Mathilda;
8. Isidor yu di Mathilda;

9. Sebastian yu di Mathilda.

Henry Soares tabata viudo di Anna Cicilia Anhtonette Simon. Nan yunan tabata Maria Catharina Margaritha, Johannes Antonius i Carolina Isenia.

E mama di Henry Soares tabata Catharina Isenia Curiel, kasa ku Johannes Soares. Henry Soares mes a muri na 1863, e aña ku e lei di abolishon di sklabilitut a dreña na vigor. El a muri ku 63 aña di edat.

Interesante den e kaso di Henry Soares, ku tabata operá e saliñanan di salu na sùit di e isla aki pa gobièrnu, ta ku su katibunan a haña despues e fam Seraus, ku ta e nòmber di bòltu di Soares. Nan a keda biba den e barrio di Tera Kòrá.

Semeler

Otro persona ku tabatin katibu na Boneiru tabata Maria Semeler. Pero na 1863, aña den kua katibunan a haña nan libertat, Maria Semeler a muri kaba i tabata su yu, Christiaan Hart, siendo úniko heredero, ku a informá gobièrnu di e katibu aki. Tabata trata sinembargo solamente di un katibu, yamá Maria Martha yu di Anna Cicilia, 43 aña di edat.

Maria Magdalena Semeler a nase na aña 1764 i el a muri na 1847 i e tabata biba na Playa den e kas numerá 86.

Woutersz

Mas aleu tabatin Adriana Elizabeth Woutersz ku 7 katibu:

1. Florentina yu di Henriette, 46 aña di edat;
2. J. Maria Charlotte yu di Florentina, 15 aña di edat;
3. E.S. Justina Idelga yu di Florentina, 13 aña di edat;
4. T. Frans Ranies yu di Florentina, 11 aña di edat;
5. Vincent Belmond yu di Florentina, 9 aña di edat;
6. Josef Rudolf yu di Florentina, 7 aña di edat;
7. P. Henriette yu di Florentina, 4 aña di edat.

Den e herendis di Willem Woutersz, firmá pa su nietu Adriana Elisabeth Woutersz, tabatin dos katibu:

1. Willem yu di Lucretia, 46 aña di edat, di profeshon nabegante;
2. Hendriette yu di Lucretia, 64 aña di edat.

A traha e tètament den kua a regla e herensia di Willem Woutersz na aña 1829, tempu ku Claas Schotborgh tabata komandùr di Boneiru i e tabata tambe den e funshon di notario interino.

E herederonan di Willem Woutersz, segun e tètament aki, tabata Thomas Gerrit Raenes, ku a muri na 1830. Thomas Gerrit Raenes aki tabata tata di Sara Jacoba Raenes, kasá di Willem Woutersz.

Willem Woutersz a stipulá den su tètament, ku na momentu ku Thomas Gerrit Raenes fayesé, mester legatisá su herensia na e siguiente personan: un nietu di Willem, yamá Herborg Woutersz, e muchanan mulato yamá Florencia, Willemina i Jan Hendrik. Tambe tabatin komo heredero e mucha muhénan mulato Plantina i Florentina, tambe e mucha hòMBER mulato Pieter Gerard.

E esposa di Willem Woutersz, Sara Jacoba, tambe a keda menshoná komo heredero di Raenes, pues su tata. Un punto importante den e tètamènt tabata indiká ku ora Sara fayesé, e katibu yamá Susanna lo keda liber di tur servisio komo katibu.

E ehekutor di e tètamènt aki tabata Johannes Matthias Prince, ku komo testigu Carl Magnus Neuman i Herman Boye.

Sara Jacoba Raenes a muri na aña 1862 na edat di 80 aña i 7 luna. Sara, segun e akta di su fayesimentu, tabata nasé na Kòrsou na aña 1781.

Pastor

Pastor Bernardus Smit di Playa tambe tabatin katibu na 1863. Tabata trata di 1un katibu, yamá Juan Kandela, di kua su mama tabata desconosí. Juan Kandela tabatin e tempu ei 78 aña di edat. Na 1863 sinembargo pastor Smit no tabata na Boneiru mas. E tabata pastor di Santa Maria, pero Pastor F.J. van Blarcum, ku sí tabata na Boneiru, tambe tabatin un katibu, yamá Juan Baptiste.

Finalmente tabatin **H.F. Wagner** ku un katibu: Samuel yu di Jeanette, 16 aña di edat.